

De Volksteller

Börgmeester het mie en Brondiek bie de volkstellen benuimd. Wie mozzen zör-gen veur de achterof-streken van Slochter en veur hail Kolham, doar Foksham din ook nog onder heurde.

'Ie willen zeker wel wat verdainen,' zee börgmeester. Geern ja. 't Was mien eerste verdainde geld. Ik kin nait zegen, dat börgmeester slim reyoal was; wie zollen elk vieftien gulden hebben en 't duurde net vieftien doagen; dat was mooi oetrekend. Wie kregen der n vleske inkert bie, dat nait omvalen kon, en as 't al omvol, din luip ter nog niks oet. Meroakel. En ik kreeg der n overjas bie aan van Piet Hennequin(*); ik haar gainent doar ik nog mit veurndag komen kon en Piet zee, dat hai haar twij. 't Was n mooie en hai zat ter om, of e goten was. En 't kwam goud oet ook. Op n

27sten December 1889 begunde 't spul om zeuven uur 's mörns. 't Was nog moar net licht, dou wie op Kolham begunden mit de pampieren of te geven. En op Oljoarsdag wazzen wie de lesten kwiet; 't haile laand was veurzain van Foksham en Borgweg of aan Schoaphok en Luddeweer tou. Noa Nijjoar de pampieren weer ophoalen en sikkom overaal invullen. Dat begunde net aansom: Foksham eerst. En doar was Holbe van Dieken dood, dij mie honderddoezend gulden geven haar; doar heb ik al es eerder van verteld. Ik mos 't waark nou allain doun; Brondiek was net as onderwiezer aansteld in Sibboeren; hai haar ook ja meer as viefvöddeljoar rondlopen..Nou, ik luip allain wieder; wat was 't mooi waark, zo bie ieder binnen te komen; was gain ain, of ik bin der vrundelk ontvongen. As ze mie nait

konnen, din Voader en Moeke wel. Allain Doomnee van Kolham luit mie wel n uur wachten in de kölle leerkoamer; hai mos ales nog invullen en hai haar n hok vol kinder.Dij was nait, hou 't heurde. Was ook oet Holland vandoan of zo, doar ze van gain fesoun waiten. Moar aans apmoal best; 1405 koarten op Kolham en 803 in de Slochter kontraainen. En op n elften Jannewoari n huile bokkewoagen vol pampieren noa 't Hooghoes tou, moar dat is weer n aander geschiedenis. En ik haar nog tien gulden ekstroa verdaind.

(* Piet Hennequin was de (kleinzoon) van de burgemeester van Hoogezand van 1878-1889) J. J. G. Hennequin)

(* H.Brondijk (1870-1941) geb. te Slochteren, onderwijzer te Siddeburen, voorman van de SDAP. Werkzaam op sociaal gebied.)

NVBN 1.9.01